

Rudzāti.

Rudzātu bazneicu byuvēja 1913. g. muižnieks Platers-Ziberks s. Karoļam Baromejam par gūdu. Tūmā pat godā Rēzeknes dekans bk. V Tomašunass jū īsvētēja. Bazneica ir 27½ m. gara un 10½ m. plata. Sīnas ir 6 m. augstas un kai nu ārpusē tai arī nu iekšpusē apšyutas ar dēlim. Grīsti ir kūka, bet greida ir līta nu cementa: pašlaik jau īsōce likt jaunu daksteņu greidu. Presbiterijam obōs pusēs ir pībyuvāti gērbkambari 3½ × 3½ m. leli. Vīns nu tim pōrvārsts par zakristiju, bet ūtrs nūdar bazneicas lītu glōbōšōnai. Vērs golvonas īejas ir treju stōvu kūka tūrnis 12 m. augsts. Trešā tūrņa stōvā ir 4 valeji lūgi un tūmā daļā atsarūn 2 naleli zvoni.

Bazneicā 2 oltori. Nalelajā presbiterijā, kuru nu navas atdola kūka balustrada, ir izcalts jauns, skaists oltors. Kūka bolti pilāri īslādz mōkslinīcisku oltora grīzumu. Oltorā speciālā veidojumā nūvītōta V. J. Sirds statuja, kuru var aizklōt, nūlaižūt J. M. Rūžaiņa Kēnenīnes svātbiļdi. Oltora augšējā daļā ir s. Karola Baromeja svātbiļde. Kreisajā navas pusē pi sinas ir mozais kūka oltors.

Bazneicas pogolmu īžūgoj 153 m. gara kūka sāta. Lelajim vōrtim ir garōki stobi un jumtveideigs vērss ar dzejļa krystu. Bazneicas pagolmā ir lels krōsōts 1927. g. misiņu pīmiņas krysts.

Rudzātu draudzes rubežōs ir vēļ Eleonorvīles bazneiceņa, kuru byuvēja grafs Borchs. Bazneica ir opola veida ar p byuvātu nalelu zakristiju. Sīnas nu iekšpusē un nu ārpusē ir apsystas ar dēlim. Bazneicas priekšpusē uz akmiņa pakōpinim ir līveņš. Uz nalela

paaugstynōjuma pasaceļ golvonais oltors ar s. Jōņa Kristeitōja svātbiļdi, bet kreisajā pusē vīnkōršs sōnejs oltors. Gaisma īplyust pa 8 lūgim. Bazneiceņu īžūgoj kūka sātmajs ar cementa stulpim.

Rudzātu draudzē ir 2454 lūcekli, kuru materialais stōvūklis ir dīzgon lobs. Draudzes rubežūs dzeivoj 167 nakatōli. Draudzes tōlōkas rubežas attōlums snādzās leidz 12 klm. Storp katōlim civillauleibu nav un jauktu lauleibu ir lūti moz. 4 pōri dzeivoj bez lykumeigas lauleibas.

Katōliskōs organizācijas dīzgon ruseigi atteista kulturveicynōšōnas dorbu. Pi goreigōs dzeives izveidōšōnas pravestam paleidz terciaru puļceņš, lyugšōnas apostolata un dzeivō rūžukrūņa puļceņi. Katōliskū akciju atteista L. K. J. B. un bīdreiba „Saulē“ Leiōka lūcekļu daļa prūt laseit un raksteit, tūmār ap 15 % vēļ ir analfabeti.

Draudzē ir 6 pamatskūlas ar 374 skūlānim un 9 skūlōtōjim, nu kurim 3 ir katōlticeigi. Ticeibas mōceibai ir 20 stuņžu nedeļā.

Pi grāku syudzēšōnas ticeigi īt lūti kōrteigi un 2/3 nu draudzes lūceklim staigoj 4 reizes godā. Ikgodu pi pyrmōs s. Komunijas pīt ap 140 bārnu. Katechizaciju, kura īlgst 4—5 nedeļas voda pats pravests. Draudzē ceļmolōs ir 10 krystu un 2 mozās kapleicas. Par Rudzātu pravestu ir 40 g. v. bk. Ontons Čamans.

25. jūnijā 7 st. p. p. sasapūcejuse tauta ar sovu pravestu bk. Ontonu Čamanu un kaimiņu draudžu gonim sagaideja pi sovas bazneicas Augstū Ganeitōju. 4 klm. nu bazneicas draudzes lūcekli beja cāluši gūda vōrtus un pasasteidze pirmi apsveikt veiskupu. Pi bazneicas arī beja sataiseiti gūda vōrti. Nalela kūka bazneiceņa beja skaisti un bogōteigi izgreznōta ar vaiņagim. Nasa-skotūt uz dorba dīnu draudzes lūcekli beja kupli puļcējušis uz Augstō Ganeitōja sagaideišōnu. Videja leluma Rudzātu kūka bazneica beja pōrpīldeita.

Taipat arī pravesta dzeivōjamō mōja tikkū beja savasta kōrteibā. Vysur radzama pilykta dorba rūka un ryupes par bazneicas izdailōšōnu.

Pontifikālōs Mises laikā bk. prav. P. Apšīnīks pateice mōceibu, nūrōdūt ticeigus pīnōkumus pret sevi pošu, bazneicu un valsti. Pēc vesperem Augstais Ganeitōjs izdaleja īstyprynōšōnas sakramentu 213 personom.